



REPÚBLICA DEMOCRÁTICA DE TIMOR-LESTE  
Ministério da Administração Estatal e Ordenamento do Território

---

*Dili, 19 Fevereiro 2009*

## **KOMUNIKADU BA IMPRENSA**

### **Conselho de Ministros Aprova Proposta Lei kona-ba Governasaun Lokál**

Horisehik (18/2), Conselho de Ministros, liu husi diskusaun ne'ebé kle'an, konkorda atu submete proposta lei kona-ba oinsá atu estabelese governo lokál iha Timor-Leste ba iha Parlamentu Nasionál. Iha semana kotuk, Conselho de Ministros aprova ona Proposta Lei kona-ba Divizaun Administrativa e Territorial, no horisehik aprova tan proposta lei rua kona-ba Governo Lokál no Eleisaun Munisipál. Proposta lei tolu ne'e maka hanesan pasu importante iha prosesu descentralizasaun no estabelesimentu munisípiu.

“Governo iha komitementu maka'as atu halo descentralizasaun no estabelese sistema governasaun lokál. Se proposta lei hirak ne'e hetan aprovasaun husi Parlamentu Nasionál, sei sai hanesan baze legal hodi realiza mandatu konsitusal ne'ebé temi kona-ba poder lokál,” hatete Ministro da Administração Estatal e Ordenamento do Território, Dr. Arcângelo Leite.

“Ami prontu atu komesa implementa descentralizasaun iha 2009, maibé ida ne'e depende ba desizaun husi Parlamentu Nasionál,” hatete Ministro Leite, “Descentralizasaun bele lori prestasaun serbisu estadu nian di'ak liu tan no mós sei asegura partisipasaun comunidade ba iha serbisu Governo nian.”

Estrutura governo lokál ne'ebé propoin iha proposta lei governo lokál maka estabelese Munisípiu iha nivel distritu no mantain fronteira distritu ne'ebé iha ona. Tuir proposta lei ne'ebé Governo submete ba iha Parlamentu Nasionál, órgaun munisípiu maka hanesan Assembleia Munisipál ho Kámara Munisipál. Orsamentu ba Munisípiu sei mai husi Governo Sentrá, maibé alokasaun orsamentu Munisípiu sei deside husi Assembleia Munisípiu, no ezekuta husi Presidente Kámara ne'ebé responsabiliza ba administrasaun munisipál. Membreu Assembleia no Presidente Kámara sei eleitu diretamente liu husi votasaun iha distritu ida-idak.

Proposta ba lei tolu ne'e prepara husi Ministério da Administração Estatal e Ordenamento do Território (MAEOT) ho kontribuisaun Liña Ministério relevante sira, autoridade lokál no sociedade sivíl nian. Durante fulan Novembru 2008, MAEOT hala'o konsultasaun liu husi enkontru ho ofisiál no autoridade lokál iha distritu 13. Iha Dezembru 2009, MAEOT halo sorumutu ho media hodi esplika kona-ba asuntu descentralizasaun no proposta lei hirak ne'e. Iha Janeiro 2009, MAEOT mós halo konsultasaun ho ONG liu husi enkontru ho FONGIL. Komentáriu ne'ebé Ministério hetan durante prosesu konsultasaun ne'e, Ministério konsidera wainhira reve fali lei hirak ne'ebé propoin, antes submete ba Conselho de Ministros.

Hamutuk ho proposta lei tolu, Governo mós prepara ona Kuadru Estratéjiku ba Desentralizasaun, hanesan planu ho oráriu kona-ba oinsá Governo sei hala'o prosesu hodi estabelese Munisípiu. Planu ne'e inklui oinsá no wainhira atu halo eleisaun ba Assembleia no Prezidente Kámara, halo kapasitasaun no treinamentu ba membru eleitu no funsionáriu administrasaun munisípiu, no mós planu kona-ba oinsá atu entrega serbisu balun husi Governo Sentráal ba iha Governo Lokál.

MAEOT simu responsabilidade hodi koordena serbisu kona-ba proposta lei ba governo lokál tuir matadalan polítika ne'ebé aprova husi Conselho de Ministros iha Marsu 2008. Parlamentu Nasionál maka sei halo desizaun finál kona-ba oinsá atu estabelese sistema governo lokál iha Timor-Leste.

REMATA.

*Atu hetan tan informasaun, favor kontaktu Sr. Joao Santos liu husi 729 4824 ka Sra. Sally Torbert liu husi telefone 731 4930.*